



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Likisa
19 Maiu 2015

Komunidade Fatumasi preokupa ho kazu inestu: husu atu kriminaliza seim hare ba idade

Iha 14 Maiu 2015, Judicial System Monitoring Program (JSMP), hala'o treinamentu ba estrutura suku no comunidade sira kona-ba asesu ba justisa formal iha Suku Fatumasi, Sub-distritu Bazartete, Distritu Likisa.

Materia ne'ebé apresenta no diskute iha treinamentu ne'e kobre asuntu kona-ba diretus umanus, kna'ar juis, prokurador, defensor públiku no advogadu privadu. Aliende ne'e diskuti mós kona-ba tipu krime sira ne'ebé maioria akontese iha comunidade no oinsa comunidade sira hahu prosesa kazu krime sira tuir sistema justisa formal, wainhira sai arguidu ka vítima nomós nu'udar testemuña iha kazu krime ruma.

Partisipantes ba treinamentu ne'e involve xefe suku, xefe aldeia, lia-nain feto no joven, inklui comunidade sira hamutuk ema nain 30, ho kompozisaun feto na'in 15 no mane na'in 15.

Xefe Suku Fatumasi João Riberiro iha sesaun abertura ba treinamentu ne'e deklara katak, nia agradese ba JSMP tanba treinamentu ne'e foin primeira vez akontese ba sira nia suku. Xefe suku no comunidade sira konsidera katak informasaun ne'ebé mak JSMP hato'o kona-ba oinsa atu asesu ba justisa formal ne'e importante tebes no iha tempu hanesan sira mós bele hato'o sira nia preokupasaun.

Durante treinamentu ne'e partisipante sira preokupa liu kona-ba kazu inestu (ran moe malu), ne'ebé durante ne'e akontese iha sira nia sosiedade no sira rezolve de'it liuhusi familia ka sistema tradisionál. Partisipante sira dehan katak durante ne'e sira infrenta problema iha sira ninia uma laran, maibé sira la hatene katak ne'e krime no oinsá atu prosesu. Entretantu kazu violénsia doméstika no kazu violasaun seksuál hasoru labarik durante ne'e sira refere ba de'it polisia. Tanba ne'e sira konsidera treinamentu ne'e importante tebes ba sira hodi bele hatene oinsa uza mekanismu formal hodi rezolve kazu sira ne'e.

“JSMP hanoin preokupasaun sira ne'ebé lideransa komunitária no partisipantes sira apresenta ne'e refleta saida mak durante JSMP hetan iha tribunál sira relasiona ho kazu inestu no oinsa atu proteze labarik sira hosi kualker forma krime hasoru labarik,” dehan Diretór Ezekutivu JSMP, Luis de Oliveira Sampaio.

Konsidera natureza seriedade hosi krime inestu no nia implikasaun ba valores familia no sosiedade, partisipantes sira husu ba Parlamentu Nasionál atu tenki kriminaliza prátika hirak ne'e. Tanba krime ne'e kontra doutrina relijiaun Katoliku no kontra mós kultura rasik.

Tanba ne'e sira ezije governu tenke hare kestaun ne'e no trata kestaun ne'e ho didiak atu labele estraga familia no jersaun sira tuir mai. Sira mós husu ba governu no parlamentu atu kriminaliza krime ne'e seim hare ba idade no konsentimentu vítima. Aleinde ne'e husu ba tribunál tenke fó kastigu ne'ebé todan ba arguidu sira nue'e atu iha duni efeitu (*efek jera*).

Treinamentu ne'e realiza ho apoiu finanseiru hosi UNDEF.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org